

Vera festo estis la kongreso de SAT-AMIKARO organizita de **Esperanto 22** dum Paskaj tagoj.

Mi estis sola reprezentanto de Seine Maritime sed aliaj Normandoj el Calvados kaj Manche ĝin partoprenis.

**Hillion** estas ĉarma vilaĝo, proksima de maro. Mi do havis plezuron piediri laŭ pado de doganistoj. Bedaŭrinde, somere, tie multege kreskas verdaj algoj. En Hillion ekzistas Centro Georges Palante kiu estas tre taŭga loko por kongresi kun multaj kunvenejoj, spektaklo-ĉambro kaj komuna manĝejo.

Dum la **laborkunveno**, ni kompreneble pritraktis temojn kaj aferojn proprajn al la asocio :

Revuo « La Sago », regionaj agadoj por atingi la celojn de la asocio, rilato kun frataj asocioj, estonteco de kulturcentoj (Bouresse kaj Grésillon).

#### Ĉiuvespere okazis spektakloj :

**Sabate**, Mervili tradicia bretona muzikilaro de kvar muzikistoj dancigis kongresanojn ; tio estis « Festnoz » ; kun bonega etoso.

**Dimanĉe**, Lino Markov ludis kelkajn gitarpecojn ; lia repertuaro fontis el diversaj epokoj. Poste, koruso « Interkant » prezentis : « Ĝeneralan Kanton », koruspoemaro verkita de Pablo Neruda muzikigita de la greko Mikis Theodorakis.

**Lunde**, Gijomo Armide kantis kaj pianludis siajn proprajn kanzonojn. « La Atendejo » muzika komedio de Georges Lagrange estis la dua spektaklo kreita de la ĥorgrupo de Vannes, nomita « La Maretanoj ». Multe da humuro, suspenso kaj intermiskomprenoj agrabligis tiun komedion.

#### Konferencoj kaj prelegoj estis tre diversaj :

-Louis Guilloux, la nesubigita (l'Insoumis) : dokumenta filmo pri tiu verkisto el San Briego, engaĝita kontraŭ suferoj kaj maljustaĵoj, amiko de Max Jacob, Camus, Malraux...

- Akvobatalo en Bretonio : diskuto pri protektado de akvo kaj naturaj medioj de fonto ĝis la maro.

- Abeloj en danĝero : En Eŭropo 30 ĝis 40 % de abelkolonioj pereis. La prelegisto klarigis la kialojn de tiu malapero kaj proponis kelkajn solvojn.

- Aganta monda solidareco kontraŭ malsato. Daniel Durand prelegis kaj gvidis debaton

- **Debato kontraŭ la krizoj** : ekonomiaj, financaj, klimataj, sociaj. La debatantoj sugestis elirovojn por ke ni konstruu optimisman estontecon, nin apogante sur alternativaj konkretaĵoj.

Okazis **ekzamenoj** kaj **festivaleto pri lingvoj** kiu ebligis malkovri la bretonan lingvon. Kaj kelkaj pretendas ... ke Esperanto ne estas kultura lingvo !!!

**Ekskursoj** estis variaj : Vizito de San Briego, de brikejo, de mitulbredejo en la golfeto,

Dum mardaj tuttagaj ekskursoj eblis promeni okcidenten « sur la spuroj de la gaŭloj » (Trégastel, Pluezek , Paimpol, insulo Bréhat) aŭ orienten (Dinan, rivero Rance, abatejo en Léhon)

**Libro-servo** de SAT Amikaro kaj **disko-servo** Vinilkosmos proponis multajn librojn kaj diskojn al kongresanoj

Rodica Todor invitis partoprenantojn veturi al Braŝovo (Rumanio) kie okazos de la 1a ĝis la 6a de Aŭgusto la tutmonda kongreso de **SAT**. Ŝi montris al ni belegajn kaj allogajn bildojn pri Rumanio, kaj pri ŝia urbo Braŝovo

La kongreskomitato el **Sète** prezentis la venontan IREM (Internacia Renkontiĝo de Esperanto ĉe Mediteraneo) dum kiu okazos SAT-Amikara kongreso de la 22a ĝis la 26a de Aprilo 2011, kune kun la aliaj francaj esperantistaj asocioj (Esperanto-France, Fervojistoj, Katolikoj kaj aliaj...).

Tiu kongreso en Hillion kunigis pli ol 200 homojn. Ĝi estis perfekte organizita. La kongres-libro estis tre preciza . Mi estas tre dankema al OKK ( Organiz KongresKomitato).

Kaj mi gratulas ilin pro la laboro farita.

Dum monato Majo 2010, mi ankaŭ partoprenos Franc-Germanan kongreson en la urbo **Kaiserslautern**. Mi esperas ke ĝi same kontentigos min.

Petro KIJ

\* Saint Briec

